

schen inseln / In denselbigen allen hats gross wesenwerk/ welde vnd cleine wasser/ vberflussig von fischen/ wachteln vnd vergiefftigen dieren/ nit grosser dan hasen vnd conin

Vierhundert milen vff Jenseit/ hat man fondenn/ das beschlossenen landt / welchs do gehet vff der rechten seiten des mehrs zweyduzent vnd funffhundert milen in die lenge Lant gantz vol lüde vnd von derselbigen guede/ als die spanischen inseln Die lüde vom lande sein gantz nacket/ sie gebrauchen sich bogen vnd pile vnd leben In gehorsamkeit Ires hernn / deserzzeit lehenmannen vnd vnderthanen des konigs/ der sie vile haben vnd sein gnant caciquen / in das gemelte beschlossenen landt schickt weylend der christliche konig don fernande/ seliger gedechtnus/ einen capiteinen vnd zwey Jar vor seinem tode/ welcher an landt quam vnd vmb anzukohmen so fondiret er dardurch beuhelhe/ desselbigenn konigs ein conuent von geistlichen vnd kurtz / darnach so hat der itzige konig daselbst aufgericht ein bisthumb Derselbige capiteine darnach als er hat angefangen das gemelt monster der geistlichen/ schiffende langs derselbigen seithen vnd do ist er ankohmen an einen hauen derselbigen seithen vnd do ist er an lant kohmen die vom lande brachten Ime seher vile perlin vnd von den grossen vnd orientalischen als sie ye gesehen sein / vnd nachdem/ das die gemelten perlin doselbst werden funden In grosser mennige/ so nant er den selbigen orth die gelegenheit oder erde der perlin In allem diesen beschlossenen landt/ do ist man brot gemacht von wurtzeln gnant cacaby/ sie machen gedrenck von wurtzeln bone darzu dienlich/ welchs sie gebrauchen vor die win Es hat doselbst vber die masse vile paen/ phasanen/ junge huner hassen conin hirtze hinnen vnd willt schwein/ welche haben den ruck vnden/ vnd den buch vnd nabel oben / Vnd ist zu glewben/ das alle seine lande eben alsweil beschlossenen landt als die Inseln/ sein serr temperiert/ von hitz vnd kelde/ dieweil das die einwoner haben doselbst sunder arbeit allezeit gelebt von den fruchten der erden / die von natur do waschen vnd sein nie bedeckt gewest/ dan von Irer hauth vnd gleichwill sein sie nit schwartz sunder sie sein weis als von der spanischen farbe/

In allen den gemelten inseln vnd beschlossenen lande dauon ich weither anzeigung thue/ dan von den andern des konigs landen/ darumb das die natur derselbigen inseln vilen vnbehanth ist/ vnd desgleichen auch das sie mugen geacht werden von der grosse einer region nach warem climat/ vnd ansehung der mappa mundj/ als vhill als die ware helfft der werlt Seine maiestat hat vnd helt amptleuth viceroy gouuernier/ vnd richter/ wie einem guthen vnd christlichen konige zustehet/ vnd seine M̄ stehet darnach vmb es allezeit ye meher ye meher zuerbessern.